

Morning Regional Dogri News Bulletin, 08th September 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. बीजेपी दे वरिष्ठ नेता ते केन्द्रीय गृहमंत्री अमित शाह होरें आखेआ जे पाकिस्तान कन्नै उसलै तगर कोई गल्लबात नेई कीती जाग जिसलै तगर शांति स्थापत नेई होई जाग।
2. औंदे विधानसभा चुनाएं गी दिक्खदे होई बीजेपी नै चुनां प्रचार कीता तेज, रक्षामंत्री राजनाथ सिंह होर अज्ज रामबन ते बनिहाल च रैलिएं गी संबोधत करगंन।
3. मुख् चुनां अधिकारी पी.के.पोले होरें अधिकारिएं गी जम्मू कश्मीर च ग्रीन इलैक्शन पैहल तैहत बूहटे लाने आली मुहिम शुरू करने दी सलाह दिक्ती।
4. मुख् सचिव अटल डुल्लू होरें जम्मू विधानसभा परिसर च जारी कम्में दी प्रगति दा जायजा लैता।

<><><><><><>

Amit Shah

गृह मंत्री अमित शाह होरें आखेआ ऐ जे केन्द्र सरकार गै जम्मू-कश्मीर दा राज्य दा दर्जा ब्हाल करी सकदी ऐ। कल जम्मू च भारती जनता पार्टी दे कारकुनें गी श्री शाह होरें आखेआ जे उनें आपूं 2019 ब'रे च संसद च आखेआ हा जे विधानसभा चुनाएं मगरा मुनासब मौके पर जम्मू-कश्मीर दा राज्य दा दर्जा ब्हाल कीता जाहग। श्री शाह होरें आखेआ जे राज्य च औने आहले विधानसभा चुनांS ऐतिहासिक होडन कीजे एह चुनांS दर्जा 370 गी खत्म कीते जाने मगरा पैहली बारी करोआए जा'रदे न। गृह मंत्री होरें आखेआ जे एह आजादी मगरा पैहला मौका होग जदुं जम्मू-कश्मीर दी जनता इक झंडे यानि तिरंगे ते बाबा साहेब अम्बेडकर दे संविधान तैहत मतदान करोग। श्री शाह होरें दोष लाया जे विपक्षी दल जम्मू-कश्मीर च परानी बवस्था कायम करना चांहदे न ते पाकिस्तान कन्नै गल्लबात दे पक्खै च न। उनें साफ आखेआ जे शांति ब्हाली होने तगर पाकिस्तान कन्नै कोई गल्ल नेई होग। श्री शाह होरें आखेआ जे राश्ट्री जनतांत्रिक गठबंधन एनडीए दी सरकार गुज्जर, फ्हाड़ी, बक्करवाल ते दलितें सने कुसै बी समुदाय कन्नै बेन्यायी नेई होन देग जिनें'गी भारती जनता पार्टी नै आरक्षण दिक्ता ऐ।

<><><><><><>

BJP-Campaign

भारतीय जनता पार्टी नै विधानसभा चुनाएं च पार्टी दे मेदवारेंदे समर्थन च व्यापक प्रचार अभियान रंभेआ ऐ। इस दरान पार्टी दे वरिष्ठ ते स्टार प्रचारक प्रचार आस्तै जम्मू कश्मीर च प्रधानमंत्री नरेन्द्र मोदी होर 14 सितम्बर गी जम्मू दा दौरा करगंन ते औंदे विधानसभा चुनाएं गी दिक्खदे होई बीजेपी मेदवारें दे समर्थन च रैलियां करगंन। केन्द्रीय गृहमंत्री अमित शाह होर जेहड़े 2 दिन दे दौरे पर हे, उनें पार्टी दे चुनावी घोषण पत्र गी जारी कीता ते पलोड़ा च इक रैली गी संबोधत कीता। इस दरान बोलदे होई उनें आखेआ जे सरकार विकास ते राष्ट्रीय सुरक्षा लेई वचनबद्ध ऐ। उंदा राजौरी ते पुंछ जिले बी औंदे दिनें च रैलियां करने दा कार्यक्रम ऐ। रक्षामंत्री राजनाथ सिंह होर रामबन ते बनिहाल विधानसभा हल्के च अज्ज रैलियां करगंन। गौरतलब ऐ जे जम्मू कश्मीर च पैहले गेड़ तैहत विधानसभा चुनां 18 सितम्बर गी होने न। दुए गेड़ तैहत 25 सितम्बर गी ते त्रीए गेड़ तैहत पैहली अक्तूबर गी चुनां होने न। पार्टी मेदवारें लेई स्वार प्रचारक प्रचार करांरदे न। प्रधानमंत्री हुंदे अलावा बीजेपी अध्यक्ष जे.पी.नड्डा, केन्द्री मंत्री शिवराज सिंह चौहान, नितिन गडकरी, मनोहर लाल खट्टर, जी.किशन रेड्डी ते होर दुए वरिष्ठ नेताएं दे प्रचार लेई औने दी मेद ऐ।

<><><><><><>

Niminations

साबका मंत्री ते उधमपुर थमां बीजेपी दे मेदवार पवन गुप्ता होरें कल अपना नामांकन भरेआ। त्रीए गेड़ तैहत चुनां पैहली अक्तूबर गी होना ऐ। त्रीए गेड़ लेई अधिसूचना 5 सितम्बर गी जारी कीती गई ही। नामांकन भरने दी खीरी तरीक 12 तरीक ऐ ते अगले दिन नामांकन पत्रें दी जांव आला कम्म कीता जाग। मेदवार जेकर चाहन तां 17 सितम्बर तगर अपना नामांकन वापस परताई सकदे न। त्रीए गेड़ तैहत जम्मू खित्ते दी 24 विधानसभा सीटें लेई वोट पाए जाने न। खीरले गेड़ च जम्मू जिले दी 11, कटुआ दी 6, उधमपुर दी 4 ते सांबा दी 3 सीटें पर वोट पाए जाने न। कांग्रेस नै त्रीए गेड़ लेई अजें अपने मेदवारें दी घोषणा नेई कीती ऐ जिसलै कि बीजेपी नै मते सारे मेदवारें दे नाएं गी खीरी रूप देई दित्ते दा ऐ। हालांके किश थाहरें पर अपने मेदवारें दे नाएं दी घोषणा नेई कीती दी ऐ। कल ऐतवार ऐ, सोमवारें नामांकन भरने दी प्रक्रिया च तेजी आई सकदी ऐ।

<><><><><><>

Poll Observer

चुनाएं शा पैहले आम निगरान होरें समूलचे जम्मू खित्ते दे विधानसभा हल्के च मतदान केन्द्रें दी व्यापक समीक्षा कीती। किशतवाड़ च विधानसभा क्षेत्र इन्द्रवाल च निगरान डॉ. ए.अरुण होरें मतदान केन्द्रें दा जायजा

लैता। उनें मतदान सरबंधी इंतजामें दा जायजा लैता ते बर्जुग मतदाताएं, महिला ते दिव्यांगें दी सुविधाएं उप्पर चेचा ध्यान देइयै इंतजामें ते सब्बने जरूरी सहूलतें दी उपलब्धता बारे पुच्छ-गिच्छ कीती। गुलाबगढ़ लेई आम निगरान सरोज कुमार सेट्ठी, रियासी ते श्री माता वैष्णो देवी विधानसभा हल्के लेई अवि प्रसाद सनें पुलस निगरान प्रदीप कुमार यादव होरें बी जिले च विधानसभा चुनाएं दी तैआरिएं दी समीक्षा कीती। इनें निगरानें रमानदारी, निरपक्ख, पारदर्शी ते शांतिपूर्ण तरीके कन्नै चुनां करोआने पर जोर दित्ता। उआं विधानसभा हल्का डोडा ते डोडा वैस्ट हल्के दे आम निगरान होरें स्ट्रॉंग रूम दा निरीक्षण कीता, एह्दे अलावा हवेली विधानसभा हल्के लेई आम चुनां निगरान ते संवेदनशील इलाकें दा व्यापक निरीक्षण कीता। पुंछ जिले च कब्जा रेखा कन्नै लगदे संवेदनशील इलाकें च मतदान केन्द्रें लेई जरूरी इंतजाम जकीनी बनाने लेई कुसै बी बूथ निगरान दा एह पैहला दौरा ऐ।

<><><><><><>

SVEEP Van(byte)

उधमपुर दियां जिला चुनां अधिकारी सलोनी राय होरें कल डीसी दफ्तर उधमपुर थमां स्वीप वैन गी झंडी दस्सियै रवाना कीता। एह्दा मकसद ग्रामीण इलाकें च जागरूकता पैदा करना ऐ। इस दरान लोकें गी विधानसभा चुनां 2024 बारे जानकारी दित्ती जाग। उनें गी वोट पाने दे अधिकार बारे अवगत करोआया जाग। मीडिया गी संबोधत करदे होई जिला चुनां अधिकारी होरें इस जतन दे मकसद पर लोह पाई। इस दरान बोलदे होई उनें आखेआ.....बाईट

<><><><><><>

Rashtriya Bal Puraskar

प्रधानमंत्री राश्ट्री बाल पुरस्कार 2025 लेई नामांकन इस म्हीने दी 15 तरीक तगर कीते जाई सकडन। महिलाएं ते बच्चें दे विकास सरबंधी मंत्रालय हर ब'रे जनवरी च इस पुरस्कार समारोह दा आयोजन करदा ऐ। जेतूएं दी घोषणा इस ब'रे 26 दिसंबर गी वीर बाल दिवस पर कीती जाह्ग। इस पुरस्कार दा मकसद बच्चें दी हिम्मत, दलेरी, समर्थ, पक्के निश्चे ते जोश गी सम्मानित करना ऐ। पुरस्कार लेई 5एं ब'रें शा 18एं ब'रें तगर दी उम्री दे बच्चें लेई आवेदन कीता जाई सकदा ऐ।

<><><><><><>

CEO Plantation Drive

मुख्य चुनां अधिकारी पी.के.पोले होरें जम्मू कश्मीर विधानसभा चुनाएं दरान भारती चुनां आयोग आस्सेआ पर्यावरण अनुकूल बूहटे लाने आली मुहिम ते ग्रीन इलैक्शन पैहलकदमी पर चर्चा करने लेई इक महत्वपूर्ण

बैठक दी अध्यक्षता कीती। जेहदे च चुनां आयोग दा 1 लक्ख शा बद्ध बूहटे लाने दा बचार ऐ। मुख् चुनां अधिकारी होरें विधानसभा चुनाएं दरान पूरे केन्द्र शासत प्रदेश च होने आली इक मुहिम बारे बचार बमर्श कीता तां जे मतदाताएं च पर्यावरण प्रबंधन गी बढ़ावा दितता जाई सकै ते चुनां प्रक्रिया दरान पैदा होने आले कचरे दे कारण पर्यावरण उप्पर होने आले असर दी भरपाई कीती जाई सकै। मुख् चुनां अधिकारी होरें सब्बने हितधारकें गी हिदायतां दित्तियां जे सब्बने मतदान केन्द्रें च चुनां दी निर्धारततरीकें दरान इस मुहिम दा आयोजन कीता जाग। पी.के.पोले होरें जिला चुनां अधिकारिएं गी आग्रह कीता जे ओह हर विधानसभा क्षेत्र च ग्रीन पोलिंग स्टेशन दे तौरे पर पंछाने गेदे मतदान केन्द्र दे परिषद च 100 शा मते बूहटे लाने दा लक्ष्य तैह करन जिसलै कि बाकी मतदान केन्द्र दे परिसर च घट्टोघट्ट 10 जां 15 बूहटे लाना लाजमी होग। एहदे अलावा जेकर मजूदा थाहरें पर इस मुहिम तैहत् बूहटे नेई लाई जाई सकदे न ते वैकल्पिक मतदान केन्द्रें दी पंछान करने ते 15 सितम्बर 2024 तगर उपलब्ध जिला चुनां पिर्देश जारी कीते गे न।

<><><><><><>

CS Assembly Complex

जम्मू कश्मीर च औंदे विधानसभा चुनाएं थमां पैहले मुख् सचिव अटल डुल्लू होरें विधानसभा परिसर जम्मू दा दौरा लाया ते जारी कम्में दी प्रगति दी समीक्षा कीती। मुख् सचिव होरें मुततलका अधिकारिएं गी आखेआ जे कम्में गी बिजन कुसै चिर दे समें सिर पूरा करना जकीनी बनाया जा। उनें परिसर दे बक्ख-बक्ख हिस्सें दा दौरा लाया ते आपूं इंदी प्रगति दा मुआयना कीता। एहदे अलावा उनें मुत्तलका मैहकमें गी इंटरनेट कनेक्टीविटी साउंड सिस्टम ते होरनी सूहलत च सुधार करने पर बी बल दित्ता। उनें नेड़में होस्टल दा बी दौरा लाया ते परिसर च लोड़चदी सुविधां दी बवस्था करने लेई आखेआ। जम्मू दे एस्टेट निदेशक तारिक अहमद गनेई होरें मुख् सचिव होरें गी जानकारी दित्ती जे दौनें परिसरें च कम्म जोरे शोरें कन्ने जारी ऐ। उनें आखेआ जे इनें कम्में पर नियमित तोर पर तक्क रखी जा'रदी ऐ इंदा कम्म तौले गे पूरा होई जाग।

<><><><><><>

GOC-NC-DCC

उत्तरी कमान दे जनरल आफिसर कमांडिंग इन चीफ लेफ्टिनेंट जनरल एम.वी.सुचिन्द्रा कुमार होरें उधमपुर दे रेजंगला हाल च रक्षा संवाददाता कोर्स भारत थमां हिस्सा लेने आले 34 पत्रकारें गी सम्मानत कीता। इस कोर्स दा आयोजन रक्षा मंत्रालय दे जनसंपर्क निदेशालय आस्सेआ कीता गेआ। जनरल आफिसर कमांडिंग इन चीफ होरें अपने संबोधन च रक्षा पत्रकारें गी ओपरेशनें बारे समझदार तरीके कन्ने रिपोर्टिंग करने पर ते बहादुर जवानें बारे रिपोर्टिंग पर जोर दित्ता। उनें खास तौरा पर नियंत्रण रेखा कश ते संवेदनशील इलाकें च रक्षा गतिविधिएं बारे रिपोर्टिंग करने होई राष्ट्रीय सुरक्षा पर चेचा ध्यान रखने पर बी जोर दित्ता। एहदे कन्ने गे उनें राष्ट्र निर्माण च पत्रकारें दी भूमका पर बी लोह पाई। इस कोर्स च हिस्सा लैने आले करवार मुंबई च

नौसेना दे मॉडसूल ते सुलूर तमिलनाडू दे वायु सेना माडयूल मगरा पैहली सितम्बर 2024 गी जम्मू पुज्जे हे। कोर्स दरान प्रतिभागिणं Counter Insurgency Force दे मुख्यालय दा दौरा लाया ते युनिट दे कम्मकाज दी पूरी समझ हासल कीती जिंदे च मनुक्खी अधिकारें लेई उंदी प्रतिबद्धता ते संभावना गतिविधियां बी शामिल हियां।

<><><><><><>

White Knight Corps

सेना दी व्हाइट नाइट कोर आस्सेआ नगराटा सैन्य स्टेशन च साबका फौजिणं तगर पुज्ज बनाने आले इक कार्यक्रम दा सरिस्ता कीता गेआ। एहदा मकसद साबका फौजिणं दे मामले ते समस्याएं पर चर्चा करना हा। व्हाइट नाइट कोर दे जीओसी होरें सत्र दी अगुवाई कीती। इस दरान साबका फौजिणं दे मुद्दें ते परेशानिणं गी सुनेआ गेआ ते उंदे थमां सुझाह बी लैते गे। साबका फौजिणं ते उंदी घरै आलिणं सेना दे इस जतन दी सराहना कीती।

<><><><><><>